



Urkunden-Sammlung zur Geschichte der auswärtigen Verhältnisse der Mark Brandenburg und ihrer Regenten

...

namentlich in Beziehung auf Anhalt, Bayern, Böhmen, ... und andere
Länder ; [Urkunden-Sammlung für die Geschichte der auswärtigen
Verhältnisse]

Riedel, Adolph Friedrich

Berlin, 1858

2499. Kaiser Karls V. Bestätigung aller Herrschaften und Rechte für den
Kurfürsten und die Markgrafen von Brandenburg, vom 1. Februar 1521.

Nutzungsbedingungen

[urn:nbn:de:hbz:466:1-56621](https://nbn-resolving.org/urn:nbn:de:hbz:466:1-56621)

2. Vnnd das Fußfolgk auff den tag Marggrethe gem Sundt verschaffen, damit sein f. gnaden dieselben sampt anderen, die sein gnad an gemelt ortt geworben haben, zu gebrauchen: dann sich je sein f. gnaden verhoffen wollen, gott vnnd sein gebenedeuten mutter werden sein f. gnaden in keinen weg verlassen, das welt Ime mein gnediger her als seinem freuntlichen lieben vettern nicht verhalten, mit enntlicher pitt, seinen f. gnaden hilfflich vnnd beyftenndig erscheinen, das dann sein f. gnaden gantz kein Zweifel tragen, in allweg geschehen werd.

3. Das auch mein gnediger her der Churfürst von Brandempurg mein gnedigen heren, dem hochmeister, des sein freuntlich pitt einen verstendigen wunndartz desgeleychen Maister hanns Vnnger Buchenmeister (sic) vberseicken vnd leyhen well.

4. Auch zu pitten, das sein f. gnaden mein gnedigen heren, dem hochmeister, mitt ein veldgeschütz versehen well, wie seinen gnaden Knebel wol berichten wirdt.

Aus gleichzeitiger Abschrift.

2499. Kaiser Karls V. Bestätigung aller Herrschaften und Rechte für den Kurfürsten und die Markgrafen von Brandenburg, vom 1. Februar 1521.

Wir Karl der fünfft, von gottes genaden Erwelter Romischer Kaiser, zu allen zeitten merer des reichs etc. —, Bekennen öffentlich mit diesem brieue vnd thun kunt allenmeniglich. Wiewol wir von Romischer kaiserlicher hohe vnd wirdigkeit, darein vnns dan der almechtig got durch sein göttlich guetigkeit gefetzt hat, allzeit geneigt sein, allen vnsern vnd des Reichs vnderthanen vnser genad vnd furderung zu beweisen, so sein wir jnsonderheit mer Embsig, denen vnser gunst vnd guttat genedigklichen mitzutheilen, die vnser vnd des heiligen Reichs vorderste glider sein vnd vns die purden des heiligen Reichs zu uerwesen mit tragen helffen vnnd sich darinne getreulich vnd stetigklichen Beweisen vnd vnerdroffenlich finden lassen. Wan vns nhu die hochgeborn Joachim, des heiligen Romischen Reichs Erzcamerer, von sein vnd des hochwirdigen in gott vatters, herren Albrechten, der heiligen Romischen kirchen des Tittels sancti petri ad vincula priester, Cardinale, Erzbischoff zu Meintz vnnd Meigdeburg, primas, Administrator des Stiffts Halberstat, des heiligen Romischen Reichs in Germanien Ertzantzler, seines Bruders, vnnd Casimirus von sein vnnd Geörgen vnd ander seiner Brudern wegen, alle Marggraffen zu Brandenburg, zu Stettin, pommern, der Cassuben vnd wenden hertzogen, Burggrauen zu Nurnberg vnd furst zu Ruegen, vnser lieben freunt, Oheimen, Churfürsten vnnd fürsten, diemuttigklichen haben angeruffen vnnd gebetten, Das wir jnen vnd jren Erben Marggrauen zu Brandenburg vnd Burggraffen zu Nurnberg sammentlich alle recht vnd wirdigkeit, freiheit, genad, gewonheit, landtgerycht vnd herkommen, die zu jnen vnd jren furstenthumben, hereschafften vnnd

herlicheitten gehören, vnnnd alle handtvesten vnnnd brieff, die Sy vber jr gerechtigkeit, wirdikeit, freiheit, genad, gewonheit, Landtgericht vnd herkomen vnd vber alle pfandschafft vnd Ambt, die Sy von Romischen kaifern vnd kunigen vns vnnnd dem heiligen Reich haben, Vnnnd auch vber alle ander sachen, als jr vettern, vater, altfordern vnd Sy von seliger gedechtnus Romischen kaifern vnnnd kunigen, vnsern vofaren vnd dem heiligen Reich samentlich vnd sonderlich erworben vnd herbracht haben, zubestettigen, zu bouesttigen, zu ernewen vnnnd zu confirmiren genediglichen geruechten. Des haben wir angesehen solich jr redlich vernunftig Bete vnnnd mercklich getrewe dienst vnnnd Ere, die Sy vnns vnnnd dem heiligenn Reich oft williglich vnnnd vnuordrossenlich erzeigt haben, noch stettiglich mit gantzen trewen thun vnnnd hinfuro woll thun mugen vnd sollen, Vnnnd darumb nach sonderlichem Rath vnser vnd des Reichs Churfürsten, Fürsten, Grauen, herren, Edeln vnd getreuen, mit wolbedachtem muete, rechter wissen vnnnd Romischer keiserlicher machtvolkomenheit bestettigen, beuestigen, vernewen vnd Confirmiren wir jne samentlich vnnnd jren erben Marggraffen zu Brandenburg vnd Burggraffen zu Nurnberg alle vnd yegliche jre gerechtigkeit, wirdigkeit, freiheit, genad, gewonheit, priuilegia, mit allen jren puncten, Landtgerichten zu Nurnberg vnd andern herkomen, die zu jnen vnd jren Churfurstenthumben, fürstenthumben vnnnd herschafften gehören, vnnnd alle handtvesten, schrift, briue vnd freiheit, damit jr altfordern vnd Sy von Romischen kaifern vnnnd konigen, vnsern vofarn, vns vnnnd dem heiligen Reich bognadet vnnnd gefreyet sein vnnnd die Sy samentlich vnnnd sonderlich herbracht haben vber alle jre Churfurstenthumb, fürstenthumb, gerechtigkeit, freiheit, genad, gewonheit, landtgericht, besitzung, Liegenschafften, Vesten, Stette, lanndtleuth, Closter vnd Closter Vogteyen, Mannen, Manschafften, lehen, lehenschafften, geistlichen vnd weltlichen, zwingen vnd pennen, Craissen, weldern, holtzern, Busschen, veldern, waiden, wassern, wasserleufften, Vifcheryen, gejaiden, wiltpennen, gericht, glaiten, Muntzen, Ertzen, perckwercken, Nutzen, zinsen, gulten vnnnd alle pfandschafftenn vnd Ambter, die jr vatter vnd Sy von dem heiligen Reich haben, vnd vber all ander Ding, wie man die genennen mag mit sonderlichen wortten, Vnd bestettigen vnd Confirmiren Inen auch zu gelsambter handt vnd sunst in crafft diets briues alle jr herschafft, nutz, Zugehorung, gerechtigkeit, freiheit, zoll, alle Groschen, Thornes vnd knappen gelt zu Selse vnd anderstwoe, die jr vettern, vattere vnd altvordern seligen vnd Sy bis auf dato diets briues besessen, gepracht, genossen vnd jnngehabt haben, Vernewen vnd Confirmiren jnen alles, so hievor geschriben steet, vnd alle die handtvesten, schriften vnd briue, die Sy vnd jr altvordern daruber haben vnnnd die iren Vettern, vatter vnd altvordern von vnserm vofaren kaifer Sigmundt, loblicher gedechtnus, gegeben hat. Vnnnd auch mit Namen die tailung vnd Eynung, die jr vettern vnd vattern, seliger gedechtnus, bey seinem leben oder Sy sich selber mit jren lannden, leuten, zwingen vnd gebietten verschriben, von vnd zueinander gefatzt, sich vereinigt vnd getailt haben, alles nach laut der briue, die Sy daruber vndereinander gegeben haben, vnd auch solch tailung, die Sy noch thun werden, oder etlich lehengutter, Sloss,

Stette, lanndt einer dem andern eingeben, vbergeben oder huldigen worden lassen, in allen jren puncten, Meynungen, artickeln von wort zu wort, als Sy begriffen vnd geschriben sind vnd furder vnder jnen begrieffen vnd geschriben werden mugen, gleicherweise, als Sy in diesem Briue gantzlich begriffen weren vnd ob sy durch recht oder gewonheit hier jnen begriffen sein solten. Vnd setzen, Meinen, ordnen vnd wollen, das die vorgenanten vnser freundt, oheim vnd jr erben dabei pleiben, der geniessen vnd geprauchten sollen, von allermenigklich vngehindert. Wir widerrufen vnd vernichten auch damit aus vnserm sonderlichen wissen vnd von Romischer kaiferlichen macht wegen mit diesem briue alle freiheiten vnd genad, die vnser vorfaren am Reich oder wir gegeben hetten oder geben wurden, die wider die genannten vnser Churfursten vnd fursten freiheit, gerechtigkeit, lanndtgericht, herkommen, brief, keuf oder geprauch in der Margkh zu Brandenburg, jm Burggraffthumb zu Nurnberg vnd in ander jren herschaften, gepietten vnd zugehorungen sonderlichen in irer gerechtigkeit der Hertzogthumb Stettin, pommern, Cassubem vnd wenden, wolgast vnd Bart vnd die Furstenthumb Rügen, Vledom vnd Graffschaft Gutzkaw, des Burggraffthumb zu Nuremberg, auch des angefels des hertzogthumbs zu Mekelburg, des furstenthumbs zu wendden, der Graffschaft zu Schwerin mit samst den lannden Stargarthen vnd Rostock, mit jren herschaften, lannden, leuten, Sloss vnd Stetten, zu vnd eingehorungen sein mochten oder schedlich sein mugen, vngeuerlich. Wollen vnd schaffen auch, das dieselben in allen jren puncten, artickeln vnd Inhaltungen gantzlich vnd gar vernicht, craftloes vnd machtloes sein sollen. Vnd gebieten darumb allen vnd iglichen Churfursten, fursten, geistlich vnd weltlich, prelaten, grauen, freyen herren, Rittern, knechten, haubtleuten, Vitzthumben, Vogten, pflegern, verwesern, Ambtleuten, Schultheussen, Burgermeistern, Richtern, Rethen, Burgern, gemeinden vnd sonst allen andern vnsern vnd des Reichs vnderthanen vnd getrewen, in was wurden, stats oder wesens die sein, ernstlich vnd Vestigklich mit diesem Briue, das Sy die vorgenanten vnser freundt, oheim, Churfursten, fursten vnd jr erben Marggraf zu Brandenburg vnd Burggraf zu Nurnberg an solch jren genaden, freiheiten, Rechten, briefen, priuilegien, gerichtten, hofgerichtten, landtgerichtten vnd allen andern obgeschriben Dingen, auch dies vnser Confirmation erneuerung vnd bestettigung nit hindern noch Irren, in kein weise, Sunder sie dabej geruehlich beleiben lassen, Als lieb einem yeden sei, vnser vnd des Reichs schwere vngnad vnd straf zu uermeiden. Mit vrkundt diets brieues besigeldt mit vnserm kaiferlichen anhangenden Insiegel. Geben in vnser vnd des heiligen Reichs Stat wormbs, am 1ten tag des Monats februarj, Nach Christi vnser lieben herren gepurth XV^o vnd Im XXI., vnser Reiche des Romischen II. vnd der andern aller jm VIten.